

# LOTTO 5

Obtenibel na cualkier rebendado di Lotto.

Cuminsando cu 4 florin, bo por gana e suma grandi aki

# Afl. 120.000,-

sorteo ta awe noch 7:45 pm

HUNGA AWO

## Lider di fraccion AVP, Jennifer Arends Reyes: Tripartite ta consolida cooperacion interparlamentario entre Aruba, Corsou y Sint Maarten



**Durante e bishita oficial di delegacion Parlamentario Arubano na Hulanda y lider di fraccion AVP, Jennifer Arends-Reyes, a comparti cu Aruba tabatin e distincion di fungi como anfitrión pa Corsou y St. Maarten. E sesionnan a transcurre den un esfera constructivo y di bon hermandad.**

Segun Arends-Reyes, e reunionnan Tripartite ta un plataforma crucial pa fortalece lazo di cooperacion y pa amplia comprendemento mutuo entre e tres paisnan Caribense den Reino. El a enfatisa cu e dialogo sosteni a demostra cu, mas leu cu diferencia, tur pais ta comparti un meta comun: un Reino cu ta basa riba respet, igualdad y solidaridad.

Durante e encuentro a trata e discusion di acuerdo di disputa

of geschillenregeling, caminda e tres paisnan a pone enfoca riba e situacion actual y e procedura cu Aruba, Corsou y Sint Maarten lo sigui hunto durante e tratamiento di Rijkswet den Tweede Kamer.

Banda di esaki, tabata un tema central e intensificacion di cooperacion regional, den un momento caminda reto global y regional ta sigui pone presion riba nos comunidatnan. Otro punto importante tabata e cooperacion na nivel di comision, cu ta busca manera pa estrecha mas e colaboracion entre comisionnan parlamentario di tur tres pais.

Arends-Reyes a expresa su satisfaccion cu e reunionnan a trece un sentimento cla di unidad y determinacion pa sigui traha hunto. Den su palabra, awor mas cu nunca e voz Ca-

ribense mester wordo fortaleci den Reino, insistiendo riba un cooperacion cu ta basa riba igualdad real y respet mutuo.

Sra Arends-Reyes a conclui cu un nota di gradicimento na e coleganan di delegacionnan di Corsou y Sint Maarten pa nan participacion y disposicion pa traha hunto, y a destaca cu e Tripartite ta sigui sirbi como un paso fundamental pa consolida relacionnan interparlamentario den Reino.

## Inauguracion oficial di facilidad nobo pa Animal Control Department (ACD)

**Ministerio di Salubridad Publico a inaugura oficialmente e facilidad nobo di Animal Control Department (ACD), un paso importante den direccion di un sistema di manejo y control di animalnan mas organisa, responsabel y sigur na Aruba.**

ACD lo fungi como un centro di coordinacion y implementacion di regulacionnan relaciona cu bienestar y seguridad di animalnan. E facilidad nobo ta brinda mas capacidad pa traha cu eficiencia, pa salvaguardia salubridad publico y pa mantene orden den nos barionan.

Ademas di su rol den regulacion, ACD ta sigui dedica na orientacion y conscientizacion di comunidad riba cuidu y propiedad responsabel di mascota.

Ministerio di Salubridad Publico ta expresa su gratitud na tur esnan cu a contribui na e logro importante aki. Minister Wyatt-Ras a indica: "Hunto nos por construi un Aruba caminda ley, comunidad y respet pa animalnan ta bay man den man."

## FOR SALE

### DICK'S MACHINE SHOP

**MILLING MACHINES-GREAT FOR SCHOFFING HEADS**

**LATHE-FOR DRUMS/SHAFTS-BEARINGS**

**GRINDERS-ALL KINDS**

**HYDRAULIC HOSE MACHINE-LOADED WITH EXTRAS**

**MAKE YOUR OWN HOSES  
TOO MUCH TO LIST**

**CALL FOR INFO  
DICK PLANTE**

📍 267F POS CHIQUITO, ARUBA

☎ 593 - 7090



## Tocante palabra nobo y cu tin raiz antiguo tambe...

**Den nos articulo semanal tocante nos idioma nacional Papiamento, un biaha mas atencion pa palabra nobo cu ta keda drenta nos vocabulario. Esaki, manera den tur idioma, ta un proceso continuo, pero cu den e epoca moderno aki ta tumando lugar cu un velocidad hopi mas grandi. Esaki bao influencia di e medionan di comunicacion digital, cu ta trece e palabranan nobo o re-inventa pa un audiencia mundial dentro di un seconde.**

Un bon ehemplo reciente di esaki ta e palabra 'narrativa' cu a haya uso local despues cu den medionan den idioma Ingles, principalmente Mericano, a cuminsa usa 'narrative' pa describi loka un persona ta conta, ta expresa. Esaki specialmente den caso di un cuento o storia cu ta keda ripiti continuamente den publicidad. Den publicidad na Merca den ultimo añanan, cu un gran cantidad di tema politico di controversia grandi, a surgi e uso di 'narrative' pa por ehemplo tema manera e acusacion cu ta migrante ta dañá e pais, sin cu esun cu ta expresa esey ta pone ningun prueba. Den e sentido aki e palabra tin un contenido un poco negativo, expresando cierto duda. Por bisa cu na Papiamento esey tambe por ta e caso, ya cu e terminonan tradicional di nos pa esaki tambe tin e mesun contenido di duda, si loka e persona ta bisa ta berdad. Por ehemplo: "El a bin cu un storia ey pa mi, pero mi no sa kico pa kere." Igualmente nos sa usa pa esaki tambe un 'cuento'. Despues nos por ripara cu e 'cuento' a bira 'cuenta', loka en principio no ta corecto, pasobra cuenta, mescos na Spaño, tin otro significado, esta un cuenta den administracion financiero, un cuenta na banco, etc. Falta di conocimiento di nos idioma ta base pa e tipo di cambio aki den uso di cierto palabra. Otro ehemplo di esaki ta e distincion entre 'suelo' y 'suela' cu pa hopi hende no ta parece relevante mas. Den nos idioma tabata existi un diferencia clave entre e palabranan aki, unda 'suelo' ta referi na tera, vloer, piso y otro descripcion di loka nos ta cana ariba. En cambio, 'suela' ta por ehemplo e parti abao di un sapato.

Den e caso di e palabra nobo aki den nos medionan di comunicacion nos ta mira tanto e version 'narativo' y 'narativa'. Ta un poco dificil dicidi cual di dos ta esun corecto, pero consulta cu idioma Spaño ta muestra nos cu en principio e sustantivo 'narrative' na Ingles ta e sustantivo 'narración' na Spaño. Sin embargo, y talvez bao di influencia di e 'narrative' ey, actualmente por mira uso di 'narrativa' como sustantivo y 'narativo' keto bay como e adjetivo di 'narración'. Manera bisa anteriormente, na Aruba nos ta mira uso di ambos como sustantivo, equivalente di e 'narrative' di Ingles. Loka nos no ta mira ta un uso di por ehemplo 'narativo' como adhetivo, loka idioma Spaño si conoce.

Pero, 'narativo' o 'narativa' ta palabra existente den nos Vocabulario oficial, o por tin palabra di e mesun raiz eyden? No, pero esey no ta significa cu nos no conoce 'naracion' y 'narador' desde leu den nos pasado. Por ehemplo, nos conoce esaki na radio y television, sigur den relato 'en vivo' di deporte, unda tabata usa e terminonan aki, sigur den añanan 50 di siglo pasa caba. Tabata papia di: "Naracion di e partido aki (mas tanto di beisbol o futbol) ta na encargo di e conocido locutor...". Tambe tabata yama e locutor e 'narador' di e evento deportivo y den discusion entre fanatico tabata debati cual locutor tabata 'nara' e wega mihor. Esakinan tur ta palabra cu den e proximo revision di nos Vocabulario oficial mester por keda inclui, hunto cu esun nobo cu nos a caba di haya.

Pa finaliza, un 'side-step' chikito. Nos a usa caba e palabra 'relato' como sinonimo di 'naracion'. Otro sinonimo lo ta 'reporte' o 'reportahe' y esun cu ta haci esey ta e 'reportero'. Aki tambe nos por detecta cierto confusion unda e concepto Ingles 'related to' a haya e traduccion erroneo di 'relata na', mientras esaki ta na Papiamento e verbo 'relaciona'. Asina continuamente nos mester vigila pa no introduci palabra for di Ingles, cu via Spaño ya ta den nos idioma, pero cu un significado diferente.